

**#AgongKita: Atur cara Istiadat Pertabalan Yang di-Pertuan Agong XVI**  
**Astro Awani**  
**30 Julai 2019**  
**Firdaus Azil,**

“RAJA dan rakyat berpisah tiada” - ringkas pepatah Melayu tersohor ini, namun cukup mendalam makna yang dikandunginya.

Penjelasan yang sering diberikan - Raja itu ibarat payung yang dipertanggungjawabkan menaungi rakyat jelata dari sinar terik mentari, dan rakyat itu diibarat sebagai lambang kekukuhan dan kesinambungan Institusi Diraja.

Mudahnya, tanpa rakyat yang dirajai, tiada Raja yang merajai.

Tarikh 30 Julai ini, negara menyaksikan Istiadat Pertabalan Yang di-Pertuan Agong XVI, di Balairung Seri, Istana Negara.

## **ISTIADAT KEBERANGKATAN TIBA**

Jelas mengikut protokol yang ditetapkan, ketibaan jemputan-jemputan utama ke Dewan Seri Maharaja didahului Timbalan Perdana Menteri berserta pasangan, diikuti perdana menteri dan pasangan.

Kemudiannya, ia disusuli keberangkatan tiba Duli-Duli Yang Maha Mulia Raja-raja, Tuan-Tuan yang Terutama, Yang di-Pertua-Yang di-Pertua Negeri, dan Yang Amat

Berbahagia Toh Puan-Toh Puan mengikut keutamaan di Anjung Utama, dan diiringi ke Dewan Seri Maharaja.

Selepas itu, majlis menyaksikan keberangkatan tiba Kebawah Duli Yang Maha Mulia Seri Paduka Baginda Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah Ibnu Almarhun Sultan Haji Ahmad Shah Al Musta'in Billah Shah, serta Kebawah Duli Yang Maha Mulia Seri Paduka Baginda Raja Permaisuri Agong Tunku Hajah Azizah Aminah Maimunah Iskandariah Binti Almarhum AlMutawakkil Alallah Sultan Iskandar Al-Haj.

Yang di-Pertuan Agong kelihatan segar memakai pakaian rasmi Istiadat Pertabalan terdiri daripada sepasang Muskat, Tengkolok Diraja, Pending Diraja, dan Keris Pendek Diraja, manakala Raja Permaisuri Agong pula anggun mengenakan Gendik Diraja, serta Kalung Diraja.

Sejurus tiba di Peterana Diraja, Baginda YDP Agong telah diberi Hormat Diraja oleh Barisan Kawalan Kehormat Utama oleh seramai 107 anggota Batalion Pertama Rejimen Askar Melayu Diraja (RAMD).

Pada masa sama, lagu 'Negaraku' dikumandangkan oleh Pancaragam Pusat Rejimen Askar Melayu Diraja, dan Istiadat Pecah Bendera dijalankan, menyaksikan Bendera Peribadi Seri Paduka Baginda Yang di-Pertuan Agong dikibarkan

Yang di-Pertuan Agong kemudiannya berkenan memeriksa Pasukan Kawalan Kehormat yang diadakan di Dataran Istana Negara, terdiri daripada empat pegawai dan 103 anggota lain-lain pangkat, diketuai oleh Mejar Abdul Hafizi Abdul Halim.

Selesai pemeriksaan Kawalan Kehormat, Baginda Tuanku berangkat meninggalkan Peterana Diraja dan terus ke Dewan Seri Maharaja, bagi meneruskan Istiadat Pertabalan di Balairung Seri.

## **ISTIADAT PERTABALAN YANG DI-PERTUAN AGONG KE-16**

Sedia dan setia menanti di Balairung Seri ialah Datuk Paduka Maharajalela Azuan Effendy Zairakithnain, diiringi panglima yang membawa Cogan Alam dan Cogan Agama, serta Adikung Bading, Dang Perwara dan Hulu Balang yang membawa Alat Kebesaran Diraja seperti Pedang, Keris, Cokmar, Sundang dan Tombak Berambu.

Pengerusi Upacara kemudiannya mengumumkan keberangkatan tiba Yang di-Pertuan Agong dan Raja Permaisuri Agong ke Balairung Seri, diikuti alunan lagu 'Raja Berangkat' oleh Nobat Diraja Terengganu.

Kedua-dua Baginda kemudian bersemayam di Singgahsana Diraja, diikuti Datuk Paduka Maharajela, Adikung, Dang Perwara serta panglima-panglima mengambil tempat masing-masing.

Datuk Paduka Maharaja Lela kemudian bangun menghadap memohon perkenan Yang di-Pertuan Agong bagi memulakan upacara, dan kemudian mengundurkan diri serta membuat pengumuman Upacara Istiadat Pertabalan Yang di-Pertuan Agong dizahirkan.

Selesai pengumuman, beliau kembali menghadap dan memohon izin Yang di-Pertuan Agong untuk membawa Alat Kebesaran Istiadat Pertabalan masuk ke Balairung Seri.

Dengan keizinan yang diberikan Baginda Tuanku, Datuk Paduka Maharaja Lela mengundurkan diri meninggalkan Balairung Seri.

Sejurus kemudian Pengerusi Upacara mengumumkan Alat Kebesaran Istiadat Pertabalan dibawa masuk ke Balairung Seri.

Serentak dengan berkumandangnya lagu “Menjunjung Duli” oleh Nobat Diraja Terengganu, Datuk Paduka Maharaja Lela kembali masuk ke Balairung Seri, disusuli Datuk Penghulu Istiadat dan Pegawai Agama Istana Negara, bersama-sama dengan panglima yang membawa Al-Quran Nul Karim, Keris Kerajaan, Watikah Pengisytiharan, dan Watikah Ikrar.

### **KUCUPAN AL-QURAN OLEH YANG DI-PERTUAN AGONG**

Datuk Paduka Maharaja Lela kemudian diserahkan Al-Quran berkenaan oleh panglima yang membawanya, dan kemudian terus berjalan ke Singgahsana sehingga ke Anak Tangga Ketiga, memohon izin dan perkenan Baginda Tuanku untuk menyerahkan kitab suci berkenaan.

Seraya menerima Al-Quran itu, Yang di-Pertuan Agong kemudian mengucup kitab itu, dan meletakkannya di atas rehal khas, di atas meja yang terletak antara Baginda Tuanku dan Raja Permaisuri Agong.

Datuk Paduka Maharaja Lela kemudian mengundurkan diri, manakala panglima-panglima lain meletakkan Alat Kebesaran yang lain di atas sebuah meja, sebelum bersama-sama dengan Datuk Penghulu Istiadat dan Pegawai Agama Istana Negara ke tempat duduk masing-masing.

## **WATIKAH PENGISYTIHARAN OLEH PERDANA MENTERI**

Selesai upacara itu, Datuk Paduka Maharaja Lela kembali bangun menghadap dan memohon izin perkenan Baginda Tuanku bagi menghadapkan Perdana Menteri Tun Dr Mahathir Mohamad bagi membacakan Watikah Pengisytiharan.

Dengan keizinan Yang di-Pertuan Agong, Datuk Paduka Maharaja Lela mengundurkan diri dan menjemput Perdana Menteri membacakan watikah itu.

Selepas itu beliau bersama-sama Datuk Penghulu Istiadat yang sedang membawa watikah, bersama-sama mengiringi Perdana Menteri ke tempat ucapan, sebelum Watikah Pengisytiharan itu dibacakan oleh perdana menteri di hadapan para hadirin.

## **KERIS KERAJAAN ALAT KEBESARAN DIRAJA PALING UTAMA**

Selesai pembacaan watikah, Datuk Penghulu Istiadat kembali bangun mengambil Keris Kerajaan atau Keris Panjang Diraja, dan terus bersama-sama Datuk Paduka Maharaja Lela menghadap Yang di-Pertuan Agong.

Tibanya di tangga Singgahsana, Datuk Paduka Maharaja Lela mengambil Keris Kerajaan itu, menaiki sehingga anak tangga ketiga, dan dipersembahkan kepada Yang di-Pertuan Agong.

Baginda Tuanku kemudiannya berkenan menerima alat utama berkenaan, mencabutnya dari sarung seraya mengucup Keris Panjang Diraja itu.

## **WATIKAH IKRAR SUMPAAH SETIA AGONG KEPADA NEGARA**

Kini tiba pula giliran Watikah Ikrar untuk dipersembahkan Datuk Paduka Maharaja Lela kepada Yang di-Pertuan Agong.

Baginda Tuanku kemudian membacakan Ikrar, disusuli lagu ‘Raja Bertabal’ oleh Nobat Diraja Terengganu.

Selesai lagu itu dimainkan, Datuk Paduka Maharaja Lela kemudian melaungkan ‘Daulat Tuanku’ tiga kali, disambut para hadirin dan dif kehormat di dalam Balairung Seri itu, dan pada masa laungan pertama, ia disusuli tembakan meriam sebanyak 21 das.

Ketika tembakan meriam berterusan dilepaskan, lagu ‘Negaraku’ kembali berkumandang.

Selesai upacara itu, Datuk Paduka Maharaja Lela kembali menghadap izin perkenan Baginda Tuanku untuk mempersilakan Perdana Menteri menyampaikan Ucapan Tahniah dan Ikrar Taat Setia Kerajaan dan Rakyat Malaysia, kepada pemerintahan Yang di-Pertuan Agong ke-16 itu.

## **TITAH UCAPAN YANG DI-PERTUAN AGONG**

Selesai Perdana Menteri membacakan ucapan tahniah dan ikrar taat setia, Datuk Paduka Maharaja Lela sambil diiringi Datuk Penghulu Istiadat, sekali lagi menghadap memohon perkenan Tuanku untuk menyampaikan Watikah Titah Ucapan di anak tangga ketiga Singgahsana.

Selesai Titah Ucapan Baginda, Datuk Paduka Maharaja Lela menghadap memohon keizinan mengambil Warkah itu, diserahkan kembali kepada Datuk Penghulu Istiadat untuk diletakkan kembali di atas dulang.

## **DOA SELAMAT POHON DIBERKATI PEMERINTAHAN BAGINDA TUANKU**

Kemudiannya, Penghulu Upacara mengumumkan pembacaan doa selamat yang akan disempurnakan oleh Pegawai Agama Istana Negara, Datuk Abdul Aziz Che Yacob.

Selepas itu Datuk Paduka Maharaja Lela kembali menghadap memohon perkenan Duli Yang Maha Mulia Tuanku mengambil kembali Al-Quran Nul Karim dari Singgahsana, bagi diserahkan kembali kepada Datuk Penghulu Istiadat.

Kemudian, Datuk Paduka Maharaja Lela sekali lagi memohon perkenan Baginda Tuanku untuk mengumumkan Istiadat Pertabalan telah selamat disempurnakan.

## **ISTIADAT KEBERANGKATAN PULANG**

Kini, Penghulu Upacara mengumumkan keberangkatan pergi Duli Yang Maha Mulia Tuanku Agong, dan Raja Permaisuri Agong dari Balairung Seri.

Sebaik tamat pengumuman para hadirin terus bangun, dan Nobat memainkan lagu 'Raja Berangkat' sambil Datuk Paduka Maharaja Lela, Datuk Penghulu Istiadat, barisan panglima yang membawa Alat Kebesaran Diraja, Dang Perwara, serta Juruiring Diraja mengambil tempat masing-masing di hadapan Singgahsana.

Kedua-dua Baginda Yang di-Pertuan Agong dan Raja Permaisuri Agong kemudian perlahan-lahan menuruni Singgahsana berkenaan dan meninggalkan Balairung Seri, diketuai Datuk Paduka Maharaja Lela dan Datuk Penghulu Istiadat yang membawa Al-Quran, diikuti pembawa Cogan Alam dan Cogan Agama serta Alat Kebesaran Diraja.

Nobat Diraja Terengganu kemudian berhenti mengalunkan lagu 'Raja Berangkat' apabila kedua-dua Baginda Tuanku tiba di pintu Balairung Seri, sebelum menuju ke sebuah bilik khas.

**© 2019 Astro Awani Network Sdn. Bhd.**

**(535275-D) All Rights Reserved.**

Source: <http://www.astroawani.com/berita-malaysia/agongkita-atur-cara-istiadat-pertabalan-yang-di-pertuan-agong-xvi-213069>